

XIV

1407-II-4, Segovia.— El Infante Don Fernando solicitando un buen caballo para la guerra de Granada. (A.M.M. Cart. Real 1391-1412, fol. 10 v.)

Publicada por TORRES FONTES, J. en Don Fernando de Antequera y la Romántica Caballeresca. Miscelanea Medieval Murciana. 1980. V. V, pág. 83-120.

Yo el Infante enbio saludar a vos, el conçeio, e alcalles, e regidores, cavalleros, escuderos, e omes buenos de la çibdad de Murçia, como aquellos que amo e preçio.

Sabed que yo entiendo muy çedo, Dios queriendo yr poderosamente contra los enemigos de la fe, por lo qual he mester pieça de cavallos.

Porque vos ruego, si plazer e serviçio me havedes a fazer que me querades servir graçiosamente con cavallo bueno qual entendieredes que cunple parte en tal fecho; e fazedlo dar a Johan Sanchez Manuel mi vasallo, vuestro vezino, para que me lo enbie. E tener vos lo he en espeçial serviçio.

Dada en Segovia quatro dias de Febrero. Yo el Infante. Yo Pero Garçia escrivano del dicho señor Infante la fiz escrivir por su mandado.

XV

1407-II-15, Guadalajara.— El Infante D. Fernando pidiendo que se le dé ayuda a su criado Pedro Garcia. (A.M.M. Cart. Real 1391-1412, fol. 37r.)

Yo el Infante enbio saludar a vos, el conçeio, e alcalles, e regidores, cavalleros, escuderos, e ofiçiales, e omes buenos de la noble çibdat de Murçia, como aquellos que amo e preçio.

Sabed quel rey mi señor, e mi sobrino, enbia alla a esa tierra e comarca a Pero Garçia de Villagomez, mi criado e mi repostero de la plata, al qual manda fazer alguna cosas que cunplen asy a (mi) serviçio.

Porque vos ruego que ayades encomendado al dicho Pero Garçia asy como cosa mia e le ayades en todas las cosas que vos dixere que cunple a serviçio del dicho señor rey, mi sobrino e mio, en lo qual me faredes serviçio e plazer.

Dada en Guadalajara quinze dias de Febrero. Yo Pero Garçia escrivano del dicho señor Infante la fize escrivir por su mandado. Yo el Infante.

